

白
華
詩
鈔

白華詩鈔

南匯趙渠直鈞

沖

學舍集

起甲午三月止十二月

漢書文翁於成都市南立學舍注

舍今郡學殆其遺址東北距使署可

署先後數旬巡試既周方冬待

命計居此

當又數月也官以學名其詩在官署所作云爾

檢亭方伯於署東偏葺竹屋落成

參旗井絡待平章盡埽榛蕪起畫廊匠選楚材資箇簞

客投震位駢簷簞藥畦蕙圃看隣近芝館蒿宮竊比方

從此蜀都添碎事綠筠堂接紫薇堂

疎排楞眼短遮欄閒架縱橫促座寬蓋頂但舉茅滿把
及肩畧遣土分塿心緣空洞傾欹少節到清森剝蝕難
絕勝百花潭上屋秋風歲歲報平安

高城無復種芙蓉石柱銷磨玉室封廣厦卽教來燕賀
名材渾未信龍鍾穩垂毳幙寒全禁爽透蘆簾暑不逢
檢點一椽三尺好柯亭何日賞音重

軍儲星火切邊籌閫外膚功破竹收摺挂漫嘲荷作柱
夷猶緩乞挂爲舟心懸白雪三城戍夢繞黃岡十稔樓
鄭重聽松爐半炊細烹春薺話林邱

同慶閣故廼瀾塔址送姚秋塘歸里

橋是弓塔是箭彎弓不射承天殿

用明季童謠承射到天殿在蜀王府

春江江盡頭一髮金焦掛帆片坐君縹緲之飛薨勸君
慨慷之離餞君才朗朗照玉山齒少肩差忝同縣生平
未識馬背腫細雨騎驢過雲棧半輪山月峩帽秋拍手
和我謳長謳川東川北路好在叱馭南摘星如球防身
孤劍徑歸去當世那有韓荊州把袂增懽別增悵菜花
風蹙桃花浪知君後夜聽猿聲却望回瀾在天上

武侯祠

闕宮長配武侯侯遺像清高竹栢幽玉帳星殘人雪涕

草廬鑑冷士風流弟兄豈分歸吳魏臣子何心比尹周

猶有衣冠熊虎慕

張關

雲旗一氣錦江頭

重過懋忠祠

木果木之變

幕友被難附祀者長興朱南仲元和顧匡時蕭山周煒

赤昂成都岳廷斌星巖華陽熊應飛楊紹沂鄭

文會稽田舒祿舒城許國及大竹縣知縣程蔭

桂之子烈潼川府通判汪時之表姪黃

鳴鏞西充縣知縣常紀之外孫長炳

授命交呼吸來祠獨涕洟營開官失隊魂冷客招旗落

月孟蘭會英聲汗簡詞浣花翁去遠拓戟古同悲

玉石驚延燼冰瓦洶戍煙殘骸虛馬革異相悞鳶肩急

難無良賤傳聞稍後先陳濤斜畔水應照筆如椽

戰地鬼呼風啣鬚一歎同受恩誰國士歸計或家僮配

食高名義迎神絕怨恫欒槍看奮埽投拜氣流虹

嘿野僧

住資陽聖水寺洪成鼎梅翁有傳

衲衣不澣面不沐長明燈下坐閉目無經可誦禪可參
一飯或盡數升粟三旬九食忘苦飢時秧斬木乘興娶
衆中出力氣深穩天假神力如熊羆謂僧爾何野記曾
長揖訊行者謂僧爾何嘿記向梅翁喚茶喫梅翁拋盞
僧傳成姓名到底無人識

送人之軍中

短裘快馬逝翩翩綵管平提露布傳祇爲大營軍令肅

送君無酒更無錢

送人無酒亦無錢坡句

述德詩爲什邡大令仁懷任思正賦

氏任之先曰繫風姓歙州三徙黔陬載競緬投筆踪隸
秉麾柄銅馬嘶長蒼鷺飛迸百戰身存一區賊靖有士
在纍有女在道各以禮蓄豈非德盛歸與掩關時際革
命武翼將軍陝西長茅隘叅將曜

仲連拒秦巨游抗述遘時孔愍守已斯吉父擅將材子

貫儒術僞朝盜兵却聘絕筆匪憚爲犧匪伺爭鵠我節

如山人心似日高義嶙峋清流冽凜司戶右丞厥身先

失節士
震遠

母也矢志而未逮旌拘限年格晦苦節貞總帷蕭蕭練

裳惻惻門無近親室有弱嬰疇任卹廢而虐侮行之死
誼亮未亡禮明曉促課業宵闕哭聲推袁此事玉光冰

清人
袁瑞

彼高才生繫寡婦子壤帔是承直鉤可使審機轉喉擇
地布趾脩脩鶴潔舉舉鵲起豆籩秩如修脯貌爾存濟
物心挾活人理殆彥方徒或伯休比喆嗣逢時諗予述

誄
文林郎
宋公

宋潛溪墓

龜城東去草封阡曾倚前星拓講筵萬乘論師投遠戍
一棺遇主卜終遷金華絕學雄文史石室流風替誦絃

白華詩鈔

卷一

四

名望各殊身世似此邦文憲亦悽然

謂楊文憲

苦菜

苦茗冬不凋苦菜夏初秀通明讀爾雅草木昧尋究微
名混一途茶茶詎同臭歌風邶國繁紀產益州舊豈徒
三月三擷采競傳購我鄉蔬筍饒是物少釘餽登盤飫
佳品快洗腥羶陋世情尙鮮新俗說太悠謬拘忌在蠶
家觸之蠶不救得毋苦寒性生氣失騰糅縱教放箸空
欲禁滿筐售君看臚臚原如飴洽仁壽

鹽井

作鹹資下潤選地及黃泉井口如拳小機心似髮牽長

筭升降促巨釜委輸便軋軋雙聲和浮浮一氣聯多年
精共塌入夜製方妍野店論砧配官場按戶煎連綱逮
羌俗聚絡應星躔利病同茶法看登土貢篇

題王駕部祿朋左手篆書却寄

籀書遞省篆書揭嶧山穹碑壯秦蹕八分盛行西漢間
今隸卽楷綜其實下蔡下杜體構湮惟有陽冰鐵爲筆
後賢摹仿私印紛近代聲名翦林溢閉門填廓絲髮紆
沒骨名花匪無質兵曹新樣學元和叔重遺篇解傳述
形聲意注歸部分高下縱橫配行份相當相對蚺蚓蟠
獨往獨來鷹隼疾公然對客揮百番巨拇分明力全出

弩牙所發猿臂紆盡斂薑芽詫且嫉天生此手工斲輪
困苦牽轡現神術入陣能期挾虜雄當杯豈憚持螯暇
少年習貫成自然左之宜之破天桎翻疑擲管通彈絲
琵琶譜法試窮詰曹綱右手興奴左左者斯優右者絀
大梁布衣王左手磅礴解衣用專壹以君書訣叅御理
舍拔逐禽百不失我携茲卷西俶裝此外隨身祇雙膝
章草休誇枝指生貝書願佑陀羅佛戰功旦晚高摩厓
篆額崢嶸擁雲日

出郊馬墜作

理轡膏騰續夢殘陌頭一跌鎖無端絕塵雅笑乘船似

得路休言躡埴難搗藥問醫愁小頓簪花試舞記長安
豪情自勸蒲黃醖未要羣公走馬看墜馬京師譙同年必演劇香山詩
自注時馬墜
勸蒲黃酒

榕巢觀察寄鹿茸

麋鹿異牝牝釋獸冠常畜環角向外間解禦禍機蹙迎
陰解斑斑堅瑩美如玉春山當養茸血影紅一簇開
侯栗圓出釜子繭熟呼羣噉昌陽肥綻到筋肉忽如新
筍抽元氣轉不足獵人巧窺伺身手一何毒或斫或引
繩催倒看盈掬雙岐渾沌分半穎精銳蓄塗酥炙烈燄
配食載藥錄松州隸劍南岡嶺鬱廼複合圍須及時九

氏效臣僕鹿斯不自由
倚斃委厓谷爲矜茸客名較勝
角仙族躋堂語嚶嚶持壽兆百祿
優旃陳諷言寇來驅令觸朱雲講
經義客來折令伏我有黃明膠爛
煮凝於粥獨少紫茄茸刀圭夢相
屬盛王仁術宏動物戒戕殞用物
能濟人解網不煩祝征西大將壘
肖象架枝木元辰拜賜脯分噉心
置腹降虜有東丹好圖絹橫幅

榕巢觀察自西徼歸成都卽送出松州

絲嬌管脆錦江清粟轉芻飛雪嶺
橫忽洒征塵歸絕徼別籌邊計倚
長城犬羊散跡分蕃遠牛馬連羣
按盜平轉爲治裝遇天假開襟樓
數八年情

芙蓉城闕玉關同喜對全家燭影紅却把笙歌辭北里
未妨談笑服西戎壺觥此處徵仁壽時觀察六初度鼙鼓何
人樂戰功想象甘松山下過到都名姓讐蠻童

芭蕉花

蕉卷心獨上心展爲葉夏秋間心或苑結不展展則成巨瓣

倒垂一瓣旣落一瓣旋吐所吐瓣之柄有朶朶盛若蜜者俗所云甘露也瓣落處其莖輒若齧痕自初瓣至瓣盡可閱一年而蕉萎矣使署蕉十餘株先後作八花以詩賚之

隰草紛甘蕉厥葉大無對卑株翹一花蓮蕊倒懸在一
瓣得氣榮一瓣成功退瓣底橐鄂攢亂鬢塞其內穰穰
盛帝漿湛湛滴仙瀼味兼厓蜜收採及房蜂隊沾脣醲
且醇膏面要分醴稻含狀自工宋祁贊不載越我來益

州改火歲將再當簷廿餘本誰手實培漑綠覆天影圓
青滴雨聲碎推窻見含蕾心結苦拘闔乍開鵲觜呀忽
反儼掌偕枵然浮巨瓢霍如掉夾袋彎環曳長柄孰把
鋸痕淬至末辦漸小到頭根已廢童童鳥希革種種人
受彫菁華坐表襮酷烈甚芟刈剝復天地心姑取數杯
酌家園栽蒔多無此好雕績華實饒上腴休咎養前晦
九芝象不侔八桂數相配方榮訖全落飽看廿弦舐修
竹莫輕彈竹花無此態

前詩脫稿循覽間一花驀墮地訊之家童則持
刀芟花際枯葉誤傷其蒂

官閒大有哦松分客少從無譽樹詞八朶蕉花如八寶
一花爭似脆琉璃

風吹霜打蒂堅牢五字吟安夜色高怪底折除花福淺
創痕新中鵬鷗刀

世途非怨亦非恩滿注黃金眼易殢好醜聽天君記取
要刪枝葉便傷根

仙茅

范公志處衡有茅鬱苞孕服食從旌陽真氣佐長命旌
陽何所師謚母養清淨白日昇丹霄遺把茁山稜剪去
春又生拔尋妙指證遺蹟在豫章朝真秋最盛是皆非蜀

產熒道今轉勝孤叢抽斷厓數節蹙荒嶝不誇三脊豎
而訝獨根迸擎刈精采宏被濯氣質定錫名娑羅參鍾
乳莫能競請誦曼碩文六味養中正揭奚斯有鰕生愍
蚤衰觚絡枯緯經失喜包匭材一二荷持贈安得拔其
茹栽蔣布月令與世躋太和無藥亦無病

題張文敏節抄史記

三真六草派雲間逸少紛充鐵石頑校遍百三十篇史
如蟲小字隱爛斑

紅雲祕殿 玉皇居無逸披張紙丈餘想象絳紗傳習

處梅花香沁學堂書

正大光明殿有文敏奉勅書無逸
篇文敏少學于先曾祖司諭

邱家斑管紫豪純纔中尚書骨帶筋笑問元明兩文敏

硬分鼎足是何人

文敏謚與子昂元宰同其筆惟用邱中黃所造

藏棗

覈物備五宜來來著標格藏產推果珍楮皮

番紙名

裹成

腊小者扶寸餘黏膩不容擘大者指數圍恬澹不容辭

如瓜雖未能入藥真足惜大荒處極西厥汗受符冊覓

種盈萬栽有睨挂林隙暈紫攢鱗鱗皺紅披的的采經

烏拉

番語牲畜

馱飽同囊宋

番語庶子出家者

喫其核尤出奇無復

仁可獲孤離兩已背渾沌一爰畫齧之若檳榔生澀介

喉噏以彼寒苦地乃集甘溫益句臚傳唱人練氣秘服

食緊余孱病身內景滯胃膈筐傾坐難致竿打路偏隔
想象西南番萬里獻心赤一笑檢農書簾影棗花北

聞蛩

候蛩吟旦晚滿聽夜分明似解助長歎非關鳴不平遠
江楓樹老斷隴豆花清知爾能驚嬾休傷旅客情

晴沙勘定拙詩因憶璞函舊語詮寄少鍾

學韓提得起學杜劉得進流膏被穹壤萬古丐餘潤君
身具仙骨遂與謫仙近非無沈著處神駿在天分年來
酬倡頻髣髴有靳要倫元九格反落宋五韻轉悔京
國游相識遲相趁坐使跛鼈姿欲飛竟難奮平生寒餓

句積歲卷扶寸零篇及亂藁大半落牆漚苦乏小胥抄
雅接故人論江湖名士多館閣大才僅品詩如品官節
鉞貴雄建轅門旗影翻幕府鼓聲震殺人不得請犒牛
爲足客諸將前膝行長恐貫耳徇是其氣饑張豈止地
望峻自爲廝養時一意覘金印請看千夫長齠腹突毛
鬣積資予叙遷無夢到方鎮吾儕幼師古門牆懼先擯
稍稍扶藩籬行行整行陳環中圍百家孰敢肆凌躐斯
人今已矣斯語媿力振入秋排集成編年紀朔閏舟車
過半生何日敝廬冀佚作希再蒐顙字待重褫文辭聲
我心事事喻鎚鈍亦知大布粗破裂耐漚拔作貢登闕

庭幔城備栽遶終輸錦段佳
差免繭絲繁側聞媿媿稿
殺青自吳郡作序諸尙虛
知音盡於頓雞鳴感風雨
豈爲獵聲聞一生換一死
枯泪曉留暈庶同賦入哀
浩然了宏願璞函以予詩如洋呢極爾貴重而非法服予謂恐是高麗布耳今觀對可服宮紉子詩是矣

木芙蓉

江鄉紅拒霜離立二三尺
臨水照葩華天寒伴楓荻
強名木芙蓉釋木那曾釋
蓉城古錦城遠城燦雕飾
已湮蜀孟踪待訪石丁宅
陰森古庭院數株影紛織
葉如梧桐方身作檉柳側
疑將芍藥花亂向樹梢拈
小大揚葳蕤高低眩的皪
是時秋未中夜露皓以白
雅無青女欺

濫受碧翁錫黃心混蘭蓮

木蓮一名木蘭一名黃心木

素面欠遮葯

懸殊感物理且向膽瓶摘一呼昌祐來渲染出枝格

張涵虛同年典試還朝

拂衣久卧敬亭雲五夜占星喜見君雪嶺旌旗方奮武
錦城絲管互論文明知後會題衿易苦識前游落帽紛
揚馬才華姑舍此好携德驥報空羣

疊韻送六峰附涵虛入都

公才公望媿青雲相士光黃獨異君斷送數升燕市酒
勾留一榻錦江文求方有藥流傳秘打卦無錢接應紛
忽向東籬別黃菊今宵愁聽雁呼羣

秦城連斗棧連雲十斛巴船泛共君行券欲書仍待命
使槎可附是衡文韁危要避軍符驟館壞須防竊篋紛
同我遠來先我返杏花紅處慰離羣

榕巢觀察自徼外貽五加皮及其詩意答之

蕃土宜五加采采挾荒磧使君憫民病作詩寄心惻一
把朝見遺通體費爬剔所取翻在皮彼皮壯吾力醫流
及道流秘義演前籍作釀香醪醺金玉賤不直是名文
章草譙侯證詮釋亦名白刺顛方言蜀人識原野紛提
筐爲利遜稌麥末重農易傷產奇吏斯蝕而我持論殊
亭徼山滌滌堅蒼入草木穀實久寒瘠以彼不毛地茁

此資民食大法占小廉豈至患共億江河發源處葉葉告蕃殖受者登麴方掘者免菜色

附原作

查禮

紅橋關產靈草葉五加

五加皮本草謂莖青節白花赤皮黃根黑應五車之精葉

或三出四五出蜀所在有之惟紅橋關所產葉多五出

香味好浸為醪調溼燥

強力益精希世寶青青生巖間采采驅松蠻芟削其

繁梗洗剝其苔斑侵星去日夕還登崖涉嶺如猿扳

摘以重五重七並重九

千金方補五月五日采莖七月七日采葉九月九日采根

治五藏筋脈緩縱

莖葉本根行處有擣成霏屑入刀圭瘳者

能起跛者走此藥產蜀稱絕奇購致日多采日危縣

符火急給官價窮蠻妻子相嗟嘻嘻吁乎哉安得縱
火烈山澤燒除此藥種稞麥

隔院聞琵琶

瀉似銀瓶截似刀四條絃子勝三條春風分少弦歌化
吹度重扉慰寂寥

百分圓緊一分遲不定興奴定谷兒惱亂江州白司馬
荻花楓葉送行時

番啼漢語鬪紛拏小部胡琴客漫誇土貢已停土風在
怕將桿撥教琵琶

通志成都貢
琵琶桿撥

支機廟大石傳是張騫所携

君不見筇竹無萌蘖無醬西使功名虛博望郭門片石
爾何來舊伴黃姑織天上投梭軋軋河鼓鳴當機照耀
裳錦明一拳貽贈重瑤玖博物且問莊君平波簾罕地
眼花眩艮象分明識爻變十牛推輓體倍尊五組包纏
價非賤錦江濯錦江色鮮杼柚安得千星躔九張須向
樂府采三品翻似奇章傳茂陵玉盃人間出不及龜城
臙山骨莫將餘巧鏤長鯨鱗甲搖風莽蕭瑟

站馬

鈴語遠分明軍符火急行騰槽芻宿飽選廐骨孤撐計
舍長塗準稽時短漏清聞呼搖腿戰

馬一時能馳五十里者謂之六百里

聞前站鈴聲及呼聲輒逐渡奮蹄爭有卒充牌去馬圍
股栗石人戰搖腿韓句如期整轡迎出門雙翅展擁路萬人驚約背黃絛
子馬牌穩隨身白袷輕烏亭沿處處鷺堠替程程得副如同倅
圖全預設偵分臺非隸驛定律本從兵烙字披毛淺通
詞對臆傾漏師嚴宿戒啟事信遄征封告臣心肅批頒
帝謂宏刺閨勞永夜開道快新晴望待紅旗慰材
看皂櫪呈西南傳檄定多少凱歌聲

中江二詠答臧大令理谷

狸首歌斑然而何白其面面白尾則狐風走疾追電是
名牛尾狸釋獸闕經傳故人笑我陋購致充朝膳法宜

帶糟蒸味勝凝酥薦融結在脂膏肌肉何由辨以彼攀
樹工百果耀璀璨橘柚爲醴漿棗栗作餽饌橘柚爲漿
栗爲餽子
由素無強食惡反使殺機先巧捷輪狙公自肥適貽患
老饕嗜珍品春拌佐諧譙狸之言不來斯言得毋謾

右果狸

蜜酒醖且醇鷺黃有餘德

放翁詩漢州鷺黃德有餘

蜀釀工撥醅豈

出火攻策眉州玻瓈春猛挾天馬力堆花出鄴江一斗
直三百不嫌醋著水不藉麴踰麥瓦鍋架松薪濡縷響
滴滴玉粒蒸自香銀餅瀉無色交濟寬猛間真氣破滯
膈擔夫擔兩簾觀者初未識簾之赴大營投醪足殺賊

腐儒例寒凍壹醉媿無益夢到下若村雲卧弄漁笛

右燒春酒

關壯繆衣冠墓

在惠陵東里許趙清獻古
今集記公墓在草場是也

亭侯追號尊王帝州將威權駕趙張義秉麟經虔斧鉞
魂隨鴻豕復冠裳蜀都遠夢天終遠宋室留題地始光
東北荒堆狐兔盡雲旗瑟瑟意蒼茫

臘前盆間一蘭欲放

軟障風霜少冬堂喜吐芽似聞空谷裏春半未開花

書院講堂落成

仲翁營講堂名載常璩志所講詞紛綸豈止春秋義是

時黃老崇儒術并髦棄太守來自舒築舍等居肆溫故
與時習左右象鱗比前有石柱聳旁有石室庀復選十
八生受經遣東詣羣遊博士門鄒魯盛不啻長卿浮薄
徒猶闡七經秘而何傳儒林蜀人無一二遺踪構書院
風雨近積廢雅懷高朕修深痛獻賊燄飭材垂一年望
古耿百世豐碑付孱筆遠媿廟堂記往聞孝經成紫微
降天際時亦稱講堂說緯太盲昧茲堂殆初祖四大等
苗裔鴻生拾級升數典戒忘墜早求鹿洞規次挾鷺湖
蔽禮殿共低回詞章特餘事

微雪

瓦縫差池白未全幾家犬走吠連連沾泥路逐霜華淺
挂樹枝分露淞鮮紙閣擁爐喧好伴柴門納履悄當年
一尊細醞笑公戲莫向邊營只向田

石符榻本

廣元縣東百丈關水中有石大如席上有文如符人謂之石符傳是張道

陵所書佩之能辟邪孕生男

扶桑繭紙凍雲墜似符非符字非字其橫三尺縱一尋
七劍在署一槩植巖關百丈厓陡懸厓下江聲響澎湃
沿江上下溪勢又貼卧盤陀淨苔翠夏漲能禁魚潦黏
曉鐘定使鳥朝避中央如鏡天剏工言是道陵手摩記
樵蕪絕跡漁釣稀響榻登登強羅致高牙大旆山鬼驚

對仗垂旒瀆靈衛縵文糾結繆篆粗誦者生箝捫者畏
堂楣高揭輝日星豈分宜男許留佩陰陽水火干刼沈
伯道無兒命所制五斗應從鄰郡傳三丰或自前朝至
青蠅在袖呵叱來化入蒼紋露眞氣羅浮竹葉猶爾爲
似此瓌奇古無二得毋漢相籌筆餘暗勒仙銘妙垂示
木牛銅釜隨燼煙獨有一卷鎮最屬呼童檢點牢記將
勿遣火薰與日曬五雷劈裂黃石飛且把陰符枕函秘

茯苓

丹竈無成兩鬢衰深山枯瘵暗凝眸一圓斲餉肥如兔
曾伴龍鱗歲月來

彤絲皓魄孕元功珍重奇材貯藥籠
檢校竹刀勻刮取
莫和薑蒜挂屏風

臘後同秋漁晴沙莘田謁慰忠祠返憩草堂寺

歷青羊二仙祠作

錦官城南冬日佳百花潭水渟一涯
瓣香無人草堂閉
右有祠宇扉雙闕問君此祠爲誰作
背嶺師濱撐千骸
文臣死事廿又六招魂禮復驅雲羣
顧公倡予沈曹和
拂拭凍涕瞻神牌短垣乍踰竹妨帽
軟梯欲下籐鉤輾
寺僧怪訊忘言說導入方丈循空階
冷光靜態落枯坐
破禪花氣來嫵娃紅齋纈眼海棠
醉間以梅萼非匹儕

幡然舍去暮色下歸途紺屋交欂櫨銅羊不鳴石羊化
三清法界音塵乖言從二仙學丹竈龍虎丁倒成倡俳
道流勝蹟出弔詭惟文騰燄光不埋草堂寺名創梁代
工部寄泊淒吟懷丈夫佗僚起悲咤時俗齷齪情難諧
公等視工部何似印囊稍暇遊宜偕淋漓痛飲慕犀首
所職已舉誰能排或籌饋糧或磨盾行惹雪虐餐風飄
得閒便著脚底屐爲樂待解腰間綯仰看纖月照羣影
麗譙昏鼓鼙鼙皆

儉堂觀察自郎馱曼陀寺寄題拙刻

奏賦忝通籍作詩從弱齡隨作手隨棄囊錦長漂零昨

行劍南道棧石驅鈴幄焉感魚鳥各愛鱗與翎吟成
付抄寫要豈謀殺青墨板誇益州唐末垂模型十牋既
傳印了了硃朋丁陸郎赤南苦相勸雕制喧都亭工紙頓
粗劣百蠹無一靈封題寄夷徼佛火宵熒熒酒將曼陀
雨落筆開丹櫺君詩數千首哀玉編瓏玲近成北征集
掩耳驚飛霆會當繡蠻布何止藏禪局我爲和凝符君
爲樓護鯖誰爲主客圖一歎天光冥

除夕

小盡宵長作大除印床休暇闌虛催租併節忙支放
載筆趨霜戀起居鬪健憤嘗南熟米蜀以米之精者曰南熟愛

閑稀附北歸書分明散學邨夫子料理囊錢俸儘餘
鐵馬縱橫閒木牛一官雖貴似懸瘤檢方恨少陳生問
謂六峰白詩不問陳生藥拆字嗤從謝石謀瓦上霜華春易轉街前
爆紙夜難休 皇恩再准三年住度歲誰如此度優
閩市燒畚喜氣重無冰無雪過三冬伶俚楸局賓逢戲
漫滅桃符吏絕供文武遷除軍令便農商通惠市心濃
不妨預想銷兵候痛飲屠蘇酒百鍾

憶弟看雲久廢眠阿羅嬉遶畫堂前眼穿一信頻經月
指數三更輒換年內府求書荒蜀板故人失計上吳船
秋塘歸試未利朝正載告青袍士好向清時勉誦絃

白華詩鈔

南漚 吳省欽 沖之

學舍集二

起乙未正月
止六月中

昭覺寺

春鳥呼春人喧喧郭門北言期石斛山風煙浩難識
蕪蕪麥妍曖曖桑柘殖雖然冬雨枯漑流滿溝洫丹垣
祇樹林邈迤望何極馬蹄隨白雲汗漫舍輕策鑪煙蕩
經幡現身百千億危標切霄漢龍藏映奎壁今時布金
黃往日劫灰黑營營李鷄子慘裂佐屠伯掀髯語破山
有肉好同喫喫肉拯衆生苦修感帝釋俾與雙桂堂開

宗冠巴夔禪關枕官道焚禮逝如織蓮花妙莊嚴人天
眩雕飾幽幽苔逕穿冷翠溼杉柏野僧長淨名雲山染
衣色蒼然對眉宇萬象悟淵默打鐘坐蒲團此豈假魔
力一掃酸餽腸歸塵影將夕

人日招秋漁晴沙笠湖澹園集扶雅堂分韻

服官喜餘暇矧乃春序暄得朋樂同類矧乃鄉曲敦吾
儕重人日日往人則存今人不古若今日古所論牀頭
酒新熟一笑開南軒細草萌壞堦幽鳥窺小園客酬主
再獻引殘長源源肴核何必嘉禮數何必煩肝膈舉傾
吐可默時可言雖無絲與竹習靜知道尊亦無監與史

觀理知色溫暮歸期常聚後會庸勿諼

客罷拙韻適成走使先示晴沙卽承見示酌字

韻詩戲報三絕

瘡能禁酒闌珊罷詩要拈題陸續催急遣長奴呈短藁
重門不鎖待書回

草堂舊事人爭引穀日清晨話定傳探得明珠光百顆
癡龍深夜惱無眠

兩家相近宜隨便三友雖歸秘未抽我欲難君君炫我

知君新得鬼饅頭

本草薜荔一名鬼饅頭
晴沙久患痔得此乃瘰

澹園寓秋漁月波亭促其分韻之作

青衫司馬例風流
運米差閒作少留
昨夜嘉蔬春酒會
去年穀日果山游
華顛爛漫宜同此
素侶招呼畧勝不
莫避主人橫槩賦
吟腰相鬪大如牛

澹園秋漁示分韻詩
言是夕已脫稿俱以行媒
遲繕疊韻自解竝促笠湖

黃昏酒罷去如流
刻燭吟嫌宿諾留
笑把春官呼後輩
暫司媒氏拉同游
連篇嬾寫情相似
詰旦忙催懺得不
應被老髯閒袖手
冷看喘月是吳牛

集晴沙泉署天妙閣觀東坡所書洞庭春色賦
蹟分韻得洞字

蘇州揀橘慎唐貢太湖栽植斷冰淞錦江西隔天盡頭
方物雖佳難伯仲天妙閣主開墨林召客傳柑飲皆痛
董公十札宋四家一卷一盃笑聲哄是書最勝出最後
墨汁淋漓望如凍去杭歸闕緣乞嫌穎尾逍遙勒絲鞵
手拈滑盞卽藥玉滑盞酒到齊入務殢然愜飛動簽書教授
都雅材同調三人遽成衆東齋求榜鎖山嶽北渚臨觀
吞雲夢囊空學富天麒麟值得蠟梅折親送忽聞都下
寄佳釀戲令分壺漉巾幪色香味三絕畢全醉後新篇
劇吟諷作詩作賦并作書酷似侯鯖列魚鱖賦心翻藉
弱弟傳自跋寄示子由酒方尙折賢王衷黃柑白墮成一家吹

入東風峭三弄酒乾墨潤春復春苦憶夜聽折春甕吾
儕對書且對酒笑署飲仙跨鸞鳳涼州十斛準先換江
陵千樹億屢中賺人缸面吾不爲頗學老坡腹空洞封
題三百帖者誰龍虎相持莫爭鬪

作前詩竟晴沙抄示原跋安定郡守以黃柑釀

酒云云郡守當作郡王疑其贗再疊前韻

贗書贗畫玉堂貢老眼看花隔霜淞指間拂拂出酒氣
妙蹟能無寶蘇仲龍圖知潁秋到官公退清閑臂還痛

公至潁有臂痛
謁告詩

華原公子越王孫簽判區區少騶哄放魚

直恐西湖乾栽檜不辭北窻凍一詩一酒都絕奇况有

長瓶驟雙轡來從保靜

王爲保靜軍留後

標記新名署洞庭顏

色動老顛能乞趙能餉餘瀝如分帝觴衆興酣落筆詞

賦成跋尾何緣同說夢爾時安定瀕曩霄作郡朱輪那

能送名王借封異借領誰割酒泉隸嶢嶢繹經僅被施

氏稱

蘇詩注王間與學官講繹經書

裂土蚤聞魏公諷

魏刻錄神宗欲推藝祖燕秦二

王後一人王之制以宗室世準爲安定郡王

分甘族子誠

有之肯令狂叟越繩纒韞塵弓袖弔西子賦語荒唐無

所衷賦眞字僞心計勞吾等公然受擲弄直須湔洗傾

惠泉一韻罰償一百甕浩呼竝識角弓蛇微吟再吐彩

毫鳳賓主俱賢茲會同自嘲不幸言而中喫手墨香前

澤存沾唇釀法先幾洞此詩膽學橘社傳定惹錢唐鬪
聲闌

三疊前韻解圍竝題卷後

青茅縮酒責楚貢萬戶千邨歌霧淞百分春色落公手
開徑欣然酌二仲半酣出卷誇示吾取譽獻嘲得毋痛
宣城毛褐假勝真故諺有之劇傳哄竹素空煩秘徵典
雌黃轉悔急呵凍世間萬事泡幻多出舌追難躡飛聲
坡仙題跋富編錄此跋雖遺趣生動斷章取義在賦首
橘中老叟壹何衆鵝眠竹籠大是黠鹿覆蕉陰豈非夢
王家釀製守署飲若箇破除與斷送朱顏載醅耳雙熱

厚坤爲席天爲幪君子寓物意不留坡語分明切規諷
其真勿喜假勿怒悟道觀空脫筌纓元祐辛未今乙未
相距迢迢待裁衷但令伸紙勢揮洒那問熟毫信拈弄
况聞內翰擅詞翰郎奇之管退盈甕屏上無妨誤寫蠅
雲間未免貪草鳳貪草雲間彩鳳書蘇句諸公善醉尤善吟健筆
應看一發中賭酒言從錦里坊估書永弄華陽洞松醪
賦蹟嗟在無持付宜僚解羣鬪坡公松醪賦跋云予嘗作洞庭春色賦吳傳正
獨愛重之求予親書其本

附
同作

金匱
顧光旭華陽

安定郡守何許人猶子簽判趙德麟洞庭春色賦兼

跋雪窓書此寄穎濱揚本臨摹世所有墨蹟非古新
非新時無鉅手此亦貴我惡其似能亂真獻歲風光
轉庭樹高談取笑娛嘉賓名公好古入骨髓樺燭夜
照紅錦茵一童捧函一持竿引函不發先飲醇星雲
爛漫爭早覩墨光黯淡紙色勻從頭展卷愼寒具松
州觀察愕且瞋揮杯大叫此贗本胡爲來此前席陳
座中勿喧共浮白視學使者今吳筠爲從此賦述顛
末坡公守穎齋厨貧其時簽判越王嗣其年辛未及
壬申陽和散入汝陰雪梅花柑酒月似銀此賦首言
櫛中樂中言達觀賢王親王名世準非郡守此跋謬

誤殊不倫公昔書此贈傳正彩筆已與風煙淪金寒
石泐八百載豈復呵護煩鬼神世間茫昧盡若此虎
皮羊質徒踐踐我聞此言更洗盞奉君筆札當幾岷
分題闢韻動鄉思洞庭渺渺波粼粼春風何處吹綠
蘋包山桂楫蕩遠津吳王觴此西子嚙一觴再觴羅
襪塵天姿國色愁東鄰安知東鄰復效顰興酣作歌
爲絕倒夜雨洗出眉山春

促諸公坡蹟分韻之作四疊前韻

占人占穀景初流口福消磨眼福留翠墨欲彫清潁守
綠尊如對洞庭游華亭削札相方未佳節傳柑及記不

莫遣玉山草堂主登壇執耳恨無牛

先是出董文敏十札相示

護國寺傳是楊文憲宅榕巢丈於其後葺升菴

落燈日招集分韻

升菴戍金齒領檄頻還家製輿狀若升而以菴名加牟
川敞廬掃瀘川游屐拏成都纂地志館局當不遐抑或
祀江瀆早年奉皇華有街字狀元佐證非繁哇佛火光
晰晰梵語聲啞啞其隅數弓地麁眼編竹笆松州老繡
衣割此恢行衙憶爲粵嶠守結巢榕樹丫洎爲益部使
仗節河上查連年走西徼燈信悽霜笳斃歸出意外葺
屋切麝麝賞心玩圖史洗耳祛箏琶懸燈照昏黑玉樹

浮銀花
花閉燈自燒
燈過花始嘉
何當花發夜
百盞擎
天斜庾園槐
婆娑宋宅茅
周遮菴興及
菴廢若不關
僧伽一笑更
呼酌爛醉天
之涯

秋漁澹園招集草堂寺適他行不果

一臺二妙興
飛揚笑引簪
裾逐隊忙細
馬障泥川主
廟二子寓齋與對流鶯喚酒杜陵堂
勞人世故終
牽率上客春
游

費測量半坐
應酬半疎懶
懶題詩在贊
公房

草堂寺落梅分韻得星字

潭水一枝青
枝殘水在庭
雪痕涼沁路
花氣暗流汀
春酌更相賞
夜吟長獨聽
倚樓風笛遠
吹髻感星星

曉起見瓶梅盡落憶諸公
草堂昨遊乞澹園榕

巢盡

蒼蜨涵古芬來自草堂寺
皦皦草堂靈悠然挹巾袂
本無曉風欺狼籍十三四
瞥眼花是空何如不花貴
羣公昨載酒惜梅寓真意
公遊如我遊豈必一枝寄
况逢梅信闌卽物感榮悴
梅開鳥俱樂梅落客紛棄
永懷草堂主側身任天地
斯寺在堂先斯梅爲堂植
因依得所宗吾輩寧留憩
非無冰雪姿偃蹇蝕寒吹
自開還自落糞火委相次
達夫人日篇有梅結遐思
爾梅動詩興雖落蘊生氣
爲煩霏瓣香掬取凍雲墜

晴沙貽橘酒二瓶四疊前韻

蜀柑平蒂壓包貢那解連餅窰花松偶攜數枚載村釀
懶聽栗留到春仲眉州華酌玻瓈春不入蘇篇劇堪痛
趙家柑酒句三見後山一和響騰哄人情貴遠易忘近
鄉味雖佳付枯凍得毋量淺嗜醇酎天馬駒難駕鞭韉
眉州玻瓈天馬駒放翁句我題贗卷鹽其腦郡守郡王筆妄動因思
洞庭木多橘踰淮之化凜頑衆黃甘陸吉非一家豈許
異床作同夢酒徒看朱每成碧地志山經孰檢送卽今
京口醞木瓜橘醞較稀羃絲幪懷土終懸斫鱸情讀書
恐誤蹲鴟諷兩壺倒贈口吸將僉訝長鯨決疎纓上中

下品辣苦甜斯語未公待評衷配色猶疑枝底垂沾香
只少帕間弄此醉在心不在酒立格要須捉卧甕來朝
醒解逐舞扇撲盡翩翩綠毛鳳種柑萬本篋萬斛脣未
濡嘗意先中爾時有叟爭局棋笑我風塵太瀕洞青州
從事化鳥有衝斷愁腸酒兵閬

早筍

冬蔬青滿畦冬筍遠難得早筍小如指謂與燕來江南
筍名
敵壅糞揚稽灰一二迸林隙是爲白甲材三月衆始喫
爭誇雷蟄初寸萌直錢百川種慈竹蕃連叢蔽邨宅厥
筍大且多味苦甚黃蘗生水煎再三風戾乾策策甘馨

雖漸回失鱖僅存腊忝遊篁簩鄉千畝挂胸膈玉版禪
試叅朝衫脫未值老夫戒爭早姑待角盈尺庶免天殮
譏堆枰敢狼籍

櫻筍

枰葉夜叉頭筍芽美人指物態胡絕殊且候蟄雷始春
尖隱膚寸掘食口同哆銀刀剖玉條現出子魚子僧製
今嘆稀蘇咏古稱旨清馨溢厨傳有鼎末由舐我僕來
楚南云可涪羊豕早虛肉食相幸識菜香理出奇購園
官饌法久荒矣一杯雖作羹三嗅欲投几不如養使成
皮毛剥纚纚補屋替青蘿衣地勝文綺口爽心發狂矧

乃味非美鄉思訃蕝鱸區區豈在此

患痔旬餘晴沙貽鬼饅頭療之五疊前韻

比年校士畢秋貢飽喫齋厨對寒松臘鼓春簫依次來
好及采蘩歸南仲流水不腐樞不蠹却爲偷閒惹疴痛
忌醫諱疾三暮朝美疢在躬畏招哄中乾雅令腸胃枯
下暴全疑血腎凍臍肛怒脹尻股欹褶袴何由坐鞍轡
虎頭老癡素同病跼伏無憖倏飛動千金古方萬金藥
誰與博施俾濟衆得者容易求者難無根靈草懸宵夢
此草非草實如果如拳兩顆打門送覺沐頻教倚板牕
煎熬定使加麻幪霍然蹶起心倏然因君感激爲君諷

人生五體結皮肉經絡相交竹支纓以腰下上分地天
清寧得一貴衡衷痺盈痺弱其失均造化小兒柄斯弄
我患癰疥非腹心龜勉加餐拆壘甕浸淫大宅元氣充
眞見身輕會騎鳳不然釋此爲外憂不治治之邪孰中
調御須尋金紫丹刀圭且記瑯嬛洞瑯嬛記朴硝治翻花痔誰拚
一舐誇得車西河老將懽忘闕

王秋汀凌雲載酒圖照

金粉江城帶白沙第三峯是列仙家人生但載凌雲酒
何必朱轡守漢嘉

綠波窅窅下灘船明月春湖阿那邊描殺數重螺黛淺

一時過眼變雲煙

大佛崖頭路舊知
幾家白酒颺青旗
開圖喚我重游夢
細雨春帆倚爨時

食齋

芹菹家甕儲樓荀
僧厨紀長公
炷鄉蔬食單坐虛此官
園新綠繁蒿迺粲如綺
春齋乾塌泥半生或半死
得地茶若飴失時齋非旨
狂呼挑滿籃瀹手轉柔靡
蜀庖聞見訛謂等道旁李
見少不見珍肉食太蒙恥
江南試燈候配餽入糲子
乍逢纖葉初要及未花始
作羹材被遺爲屈不知已
世途營苦甘棄取有常理
豈無嘗膽人欲

與蓼蟲比三誦谷風篇閉門吾老矣

庭前杏花

鄰杏拂香空南齋萼破紅後開還後謝不敢怨春風

藏香

薰籠媚閨情炷爐誦佛號香市喧蜀都却被海南笑謂
乏龍腦珍兼遜鷗斑耀下駟安可充先韋幸無躁尸陀
林各天西藏直西徼唾棄南北宗貼耳奉黃教吹螺響
鳴鳴轉幡影浩浩正法如日懸一氣大感召甘松及珠
貝百鍊入鎚銚搗爲元霜精搓作金管貌星星微火來
煙篆四騰掉其臭淡無言其燼光有曜重帷閉少時融

液透百竅辟邪具神通那必數醫療方今威德宏神僧
契元照重舌赴東土焚頂祕虔告區區登貢餘惹衣記
廊廟使臣荷分致羌情驗謹叫束香同束劄價壓萬躡
噉鄭重燒博山心清遠聞妙

藏璚璚

蘆城出魚通鳥斯藏聯屬水草健移帳羊牛富量谷豈
惟馳騁便寢食利皮肉一毛積萬毛穉穉細盈朶漫撚
體漸龕交搓緒相續數丈亘一條條條受機軸詩注軸受經
經之旋緯之織作妙緣督長鉤準高架用手不用足正
成刮使光束卷詫豐縟彼中霜雪繁適體耐寒燠披風

黑貂檐藉勝紫熊褥入市茶馬偕任貢組纁忽皇靈
被戎夏如布罔越幅扈夷徠桐漿準部資考牧璫瑜致
新羅錫登獻身毒弓衣繡詩句卽事驗懷服殊珍何自
來展對見羌俗復陶製效秦黃潤價壓蜀賓蜀番馳尼
攷校昧前錄爲報割瓊情纏綿佐宵讀

局院兼旬榕巢觀察言升菴梨花大放且告行
西路大營

行衙分構一龕牢幾樹當軒客醉豪按罷紅牙春似海
勸君休賦伐櫻桃

盡梁早燕聽餘旬歲閨花遲苦泥人丹杏碧桃零落久

斷無好雨灑車塵

松棚晝掩足音登
貝院香霏撲座濃
披盡黃茱連白葦
梨雲寒隔兩三重

楸砥

西營地名

年年傍鼓枹賞花有分返成都
北征一賦西

征又雙井詩傳一帖無

山谷有梨花詩帖觀察書學山谷時又將出微

稌日榕巢觀察送牡丹言楸砥多此

鋪堂花鬪影嬋娟
未是江南穀雨天
禊節分明攜酒酌

鄉風錯迕著酥煎
傳言西徼開同此
折與東風信偶然

一種多情山谷老
天彭遺譜落烽煙

復齋漫錄孟蜀時兵部尚書李昊每

將牡丹同牛酥贈人曰花餅
即以酥煎食之無棄穠艷

偶酌戲寄都下故人

我生弱冠前入脣酒能品兩輪佐兩壺覆掌無餘瀋數
載落江湖失德倍危懍號呶厭鯨吞驚避宵魚淦京華
新故交勸作文字飲有時乘衆醉連倒杯十錦陶然俟
其醺腹痛劇瘁凜寸腸枯不甦大戶未詳審謂我強悍
成安得食桑甚一病博一升責難壹何甚因此壁再堅
衆目怒交暉最苦南隣朱筠竹更陷東陽沈南樓挪揄復訓
笑塞耳歛衿衽泊來東西川兩閱秣田稔邀牀趨嬰游
鹵饌訊調飪偶焉三數杯向晦獲安寢豈關案牘疲尙
恐車裯慘苦樂心自知勿向舊游諗護戒與破除其權

我所稟他時旗鼓逢有口我仍噤

庭草有似藥苗者久乃審其非是戲作

枇杷傍院低啣實芍藥臨堦錯護苗今日輕鋤前日灌
多時安穩過花朝

移橙洗竹費週遮更綴籬英殿物華拔去一蕝餘臭在
有人重認牡丹芽

移菊簡晴沙觀察

時菊榮故栽連叢狀紛糾有若未時秧兼似待排蕩過
盛虞兩傷一一亂蓬首今年春雨稀日灌水數斗舊本
新吐苗按法利疏剖不記紫與黃不問妍與醜欲接根

恐傷欲澆葉易朽分盛老瓦盆護視同扞揶冷官廳院
閒作花爛重九花發吾未歸栽花吾亦偶側聞烏府間
二鶴夜相守鶴如君子身菊是隱人友擔致重滋培庶
幾脩清酒勿使俛啄殘負此種花手

雹

是日農壇禮成老農言歲戊辰金川垂平時
亦有此異沈氏筆談河州雨雹大如卵小者

如炎悉如人頭耳目口鼻皆具
次年河州平蕃戎援首者甚衆

蜀地無冰暝易回紛紛冰子大如杯響敲鴛瓦千門震
冷逼鱗滕百草摧陰氣欲凝何太暴 聖朝雖有不爲
災遺民解識銷兵兆幸語羣公畢九推

木李作花甚盛

西府春三度繁枝膩絳紗無人知木李言是海棠花

示碑工劉國棟

浮生如隙駒名藉金石壽鐫碑雖末技筆勢耐尋究或
鉤或上丹絲髮懼差謬所以北海書必待靈芝鏤關中
富遺蹟半出漢唐舊古法參靜藏稍稍見傳授自我來
兩川留題意倏憊匪戒秦火焚先病蜀刻陋爲文記講
堂郡學記亦就是皆文翁澤紀載眩恟霧爬蒐徧百家
粗喜辨句讀書者均可傳摹勒遠懸購勒成拓一通鄭
重挂宦漏倘令刊石經聚觀定輻輳黨碑鳩匠初安民
畏遺臭仲寧在九江並解護元祐

山谷題九江石工仲
寧所居曰琢玉坊太

守召刊黨籍碑辭曰寧以刻蕪黃詞
翰得飽煖今不忍下手見揮塵錄
爾生遭太平憤烈
無可嗾惟期精益精
禁帖窺結構運刀若運管風雨
快馳驟將軍告賊平摩厓仿斯繒爲煩重下手萬古墨
花繡

校射

治蜀宏文易稱梁受氣偏澤宮侯服外相圃子城邊地
是荊州借係制府官非驃騎遷碧螺行次引繡纛座中

舉步準勺施梁幫舒滿拓今射者稱兩從容看壹發

歷亂信三穿雁翅排行穩黿頭描喏圓賃衣聊楚楚聽

鼓最闐闐短眼毫芒審微忱
朶殿懸紫光籠仗彩青

翰帶爐烟衛士勞

親選詞臣許代填

煅試武進士外場上御紫光

閣前閱選以記注官之在紅本處者籍所中多寡他記注官侍班如儀

自來宜整暇卽此

序賓賢一別承明上重經歲校先水廳頻糞埽雪徼尙

戈鋌入隊青衿耀

去年有武生准入營伍之令

成俘白組鮮

故事獻因用白

組試充弓箭手隨尾勒燕然

初夏寒寄述菴西軍小牧南軍

翠地湘紋不上鉤脫絲時候反披裘胡琴帶潤梅迎雨

楚簾含涼麥送秋玉粒盡輸瀦水口鐵衣猶滯雪山頭

暄寒易序占天意爲練精神破貝州

理鬢

病葉未秋黃病鬢未老白皎皎千萬絲一薙了無迹願
鬢頰則髯均表丈夫德厥梢油漆光厥根雪霰積當其
初茁時短芒吐牟麥謂無黑者存窺鏡怒呀赫霜鏹張
兩箔利用快擒賊一孔三數莖如月記死魄隨鐫隨再
滋元氣受戕蝕顧影無奈何鉛膏藉塗飾連皮紛點黛
透爪苦暈槩效張華置囊嘲陸展媚室有激姑舍旃本
未判兩色近肉浮皚皚垂領照奕奕譬之梧桐枝到末
反堅實外強中或乾直尋枉僅尺得毋稟氣然物理悔
未格茲鬢獲晚遇意外拱完璧殷勤語華髮覆髻弗施
幘揜惡惡愈彰葆真慎胎息

次韻酬澹園索松江詩牋

濃塗金粉淺塗卮百番談牋爛漫披物產已虛名伎井
人情如作去秀才時聯翩錦段驚酬我瑣碎麻紋欲譜
誰從此抽毫先斂彩一方紙限數行詩

講堂示書院諸生

靜女守淡妝美人照炫服所尚雖不同禮義先自淑經
術宏漢京一埽獷秦毒祈嚮非大醇相誘在利祿儒生
生盛朝豈貴老岩谷實至名自彰本荒末乃逐園令
東受經斯語自秦宓何如張七車春秋通比屬之欲文切
翁舊精舍頗慮草蔓鞠適來棟宇新載考講堂躡東南

卽頻宮禮殿溯傳續生等生是邦懷古心肅穆恂恂鄒
魯風赳赳巴渝俗趨慕一以岐吾道遽貽辱因念治蜀
賢抗顏媿幽獨

竹葉蘭

葉分穉竹難成翠朶效崇蘭不吐香微幸移根白瓷斗
午風吹透讀書堂

草蘭易辨都梁種竹柏須等峨嶺芽若使涼秋重見此

祇應錯喚石蟬花

吳人謂一花一葉者爲草蘭
竹柏產峨嵋山宋祁有贊

夏至後一日凝臺觀察餞集使署喜雨

齋壇過宿戒閏歲遇乾封蜀犬嗥相應吳牛喘易答匆

匆行部遠欸欸離筵供舊宅票姚壯新衙驛置衝

署故岳公

鍾琪別宅

洋棠紅爛漫省樹紫蒙茸檻拂波簾靜厨開畫幃

濃鶯聲迷雪微龜兆圻春農縱使銷金甲還當禱玉瓏
汗流咸浹雨雲起忽排峯白點懸霄下金芒閃座重挂
脾來滾滾作陣去溶溶珠璧珍無價梁茨力可逢微涼
生越簟餘潤逮蠻賓對酒情何限催詩興未慵蕭條炊
白夢搶攘輓糧踪塹爾辭戎索

觀察向以輓糧駐紮相雅間時有安仁之戲

將洗賊鋒豐收多十斛痛飲必千鍾明發乘江漲高城

隔暮鐘

題惺亭制府土蕃欸塞圖

西北曰塞蕃部稠四衛拉特枰畫楸土尔扈特最荒優
未奉冠帶祠春秋有元子孫麗不億外氏策妄

先朝讐悉率醜類避崑嵫牧場水草行相求劈正斧沈
質孫敝廬帳非帳裘非裘我

皇拓地越葱嶺準回種類盼共球萬亭障外怨遺已渡
額濟勒輕若泗生身熟身尸三萬革履辨髮詞咿嚶畏
威渥惠敏關吏會值秋令循軀腰紫絲韁轡迓天寵
親覲殺虎神鎗陪宗乘廟前禮銅殿旋騎特許經邊
郵佩印編旂校丁衆頒朔讀法安田疇於濶布多聚屯
厥黃羊紫鼠馳馬牛我臣悉臣主悉主蒙古族盡歸覆

幬公時麾節鎮戎索頓置屏屢儲芻餼遠携小隊問疾
苦要使絕域知懷柔諸蕃岌然遶牙帳進止鞠脰龜排
頭爾會祖某爾祖某爾昆弟某嘗招尤某山某水某夷
險館堠食宿如經由驚呼駭汗手加額公神人也誠斯
投各以其職歲來覲陪臣義敢忘干揆是年鄙人使西
粵錯迂無異周南留象胥譯舌渺根據忝視典冊封其
酋鼎鐘爲述祖德遠綸綍深畏 王言羞我公圖此紀
行役丹青王會交弼彪錦江展對愜春色懷古坐歎籌
邊樓滴博蓬婆彈丸耳宵旰幾載勤咨諏 王師埽巢
事俄頃拜釐圭鬯光揚休 封沙拉扣肯郡王舍榜
貝子冊文皆欽擬撰

和韵無名氏石谿亭

亭在隆昌詩見漁洋詩話

巴渝煙雨荔支青曾倚蓬窗問玉屏一種詩情昵回首
石谿橋畔石谿亭

嘉州食荔支

少長東海隅尤物自洋舶漬以蜜與酒色香味差得雖
非薦新采猶道赴鮮喫中年乘使輅桂嶺有行迹小暑
會告徂輕紅負親擘唐貢歲取涪坡語苦未覈南海片
段筐彼產實馳驛詩人眩鄉土可口哆津液不見眉倅
廳子由詩注眉倅伸手無可摘朝來食指動珍果致的
的絳襦白玉膚了了恣披析天漿斟飽滿仙酒審芳澤

稍嫌名實浮少肉乃豐核主人笑謂我茲樹茲土特守
之閱數旬采之靳一鬲非關苑鳥啗請效齊糟食肉饑
我弗愁中乾誰似腊物少斯見珍肯遣六丁掇我欲懷
種之遷地復何益庶作嶺南人日噉顆三百

嘉州寄陳太守時若軍中

鹽峯照日紫氤氲燭醉琴歌袂久分借問兩年漢嘉守
幾時載酒到凌雲

陳居九江
之甘棠湖

劍炊矛淅住松岡礮火驚飛百戰場解識西南夷變俗

講堂分厠兩何郎

君嘗爲茂州土司
二子請入書院

墨版雕摹失舊痕孟家經字石無存此間也奉求書詔

難向書坊叩解元

鐙岩文體宿稱豪重見潯江一羽毛好及莎羅奔繫頸

省油燈盞爲君挑

嘉定省油燈見
老學菴筆記

腹疾肖山司馬遺布褥

伏日裝縣蜀布斑鞠蒨隱語誼相關隱囊龍配人排倚

錦段先防客卷還

用少陵張舍人
遺錦褥段詩意知己感生車吐處逮

親泪盡鼎烹間因君懷抱兼棖觸宵夢難圓鶴骨孱

爾雅臺

金山臨石簞曾訪郭公墓墓兆豈在斯曷經慣沿誤頃

來爾雅臺高險踞岩路當年放散身爲作蟲魚註墨花

染江鱗鱗洗不去到今桃浪時黑頭恣漁捕得毋白
鼃精精氣永呵護近賢記名勝強半出依附烏尤卽離
堆冒名復何處側聞犍爲郡自漢入貢賦舍人暨文學
箋記滿竹素此學誰與承此業誰與付願言借一額投
老老經庫